

# La passiun per uffants e per la lingua

■ (cp) A Glion ha la Lia Rumantscha (LR) envidà persunas che s'engaschan en il sector da la prescola ad in inscunter. En il center è stà in curs cun ideas co intermediar ils versets dal cudeschet «Plitsch Platsch». La LR ha organisà sonda passada a Glion ina sentupa da per persunas interessadas che lavuran en canortas ed en gruppas da giu en Surselva e che vegnan en contact cun la lingua rumantscha.

L'emprim ha *Flurina Plouda* (LR) preschentà il cudeschet da versets «Plitsch Platsch». Silsuenter han la musadra *Carmela Guntli* e la pedagoga da musica e moviment *Flavia Walder* dà impuls ed ideas co intermediar a moda creativa ils versets da quest cudeschet. Da maniera viva ed entusiasmana han ellas preschentà exercizis da ritmica ed exercizis cun chanzuns, musica e moviment.

En pli èsi vegnì discutà davart giavischs e basegns che persunas engaschadas en la lavur cun uffants pitschens han envers la LR. La lingua gioga ina rolla impurtanta en las canortas ed en las gruppas da giu – adina dapli uffants vegnan qua l'emprima giada en contact cun il rumantsch e per part era l'emprima giada cun il tudestg. La promoziun da la lingua en quella vegliadetgna stgaffescha ina buna basa per la scoletta e pli tard per la scola. Ultra da quai han ils uffants pitschens la pussaivladad d'emprender la lingua cun far termagls e giugar.

Cun metter a disposiziun cudeschets da versets e chanzuns, ordinaturs tematics e bler auter pli sustegna la LR il svilup da la lingua rumantscha dals uffants. Las materialias che sa drizzan als uffants, ma er a lur geniturs ed a pedagogas e pedagogs fa la LR accessibel en il rom da ses program da famiglia sin [www.kidsfits.ch](http://www.kidsfits.ch).



Mussadras ad in curs d'ideas co intermediar versets dal «Plitsch Platsch».